

3138/1483



3138/1488

CHINESE - JAPANESE COLLECTION
HARVARD COLLEGE LIBRARY
DEPOSITED BY
HARVARD - YENCHING INSTITUTE
JAN 22 1936

THE
LIBRARY OF THE
MUSEUM OF
COMPARATIVE ZOOLOGY
AND ANATOMY
HARVARD UNIVERSITY
CAMBRIDGE, MASS.

齊

乘

齊乘

重刊齊乘序

凡著述必有關於民生風教。斯能動鬼神。共古今。而

朽。而又有數與命焉。益都先有元魏時賈思勰。其家思

伯思同。竝有列傳。載于魏書。而思勰獨無。思伯有明堂

禮議。思同有春秋左氏辨十卷。皆不可得見。而思勰之

齊民要術。獨傳。自思勰後。近千年。有元侍郎于欽。齊乘

于之名。不見于元史。且史志不及藝文經籍。而明史志

藝文。又不及前代之書。故元人著述。散而無紀。其傳于

今者。轉不及唐宋之多。而齊乘于今。特著。豈非命乎。數

乎。又聞于之爲此書也。夢有趙先生者。謂曰。君修齊乘。

僕有一良友。葬安邱。其人節義高天下。請載之以勵末

哈佛大學漢和
圖書館珍藏印

全而不

齊東野語
俗覺而異之。閱趙岐傳始知爲孫賓石也。豈非著述有關係者。鬼神亦爲之默贊邪。夫表揚前哲。諷勵風俗。有司之職也。余向權知青州。篋中先有是書。思付之梓。以廣其傳。匆匆未暇。頃蒙

恩改守登州。道出益都。與明府周公兩勝。偶言及是。君與余有同志。遂從憑以成之。原書中常有舛誤之處。君又爲考證若干條。附于各卷之後。乃剞劂方竣。忽赴修文。考證僅具草藁。余頗爲是書惜。而君有賢子。字繼干。力成其先人之志。真所謂肯堂而肯構者。按是書初刻于于公子潛。明嘉靖甲子。青州守四明杜公。又爲重刻。然流傳者大都寫本。非好古家。不能有。今得明府喬梓表章。

之功。庶幾流傳益廣矣。而齊民要術。則早入四庫之藏。且有聚珍印本。風行宇內。此固其著述之精英。有不可泯滅而非遇。

盛世右文。恐亦湮沒而勿章。是又其書之命與數矣。乾隆四十六年九月。朝議大夫。登州府知府。前進士。桂林胡德琳序。

元序

齊乘六卷。故兵部侍郎于公志齊之山川風土郡邑城郭亭館丘壠人物而作也。古者郡各有志。中土多兵難書。弗克存。我國家大德初。始從集賢待制趙忭之請。作大一統志。蓋欲盡述天下都邑之盛。書成藏之祕府。世莫得而見焉。于公生于齊。官于齊。考訂古今。質以見聞。歲久始克成編。辭約而事核。公在中朝。爲御史憲臺都事。左司員外郎。終益都田賦總管。以文雅擅名當時。旣卒。其家蕭然。獨遺是書于其子潛。余官維揚。始得閱之。嗚呼。齊地之彊。民物之夥。自古然也。桓公任管仲以成霸業。聖人嘗稱其功。謂一變能至于魯。後世去古雖遠。

齊乘序
山川郡邑猶存。革其俗以化其民。獨不在夫。上之人乎。當漢之始。兵戈甫定。曹參爲齊相。師禮蓋公。以清靜化民。齊乃大治。茲非其效歟。今齊爲山東重鎮。所統郡縣五十有九。宦游于齊者。獲是書觀之。寧無益乎。予于公之言。重有感焉。謂三代兩漢。人材本乎學校之教養。謂風俗自漢晉以降。愈變而愈下。美昔人之賑饑有道。歎近世之採金病民。以稷下學術流于異端。以海上求僊惑于神異。斯亦足以槩公之志矣。夫公諱欽。字思容。益都人。潛擢南行臺掾云。

至元五年己卯冬十月丙戌朔嘉議大夫江北淮東道肅政廉訪使蘇天爵序

齊乘目錄

沿革

分野

山川

山水

郡邑

古蹟

城郭 亭館

丘壠

風土

人物

齊乘卷之一

益都于欽思容纂

沿革

帝嚳九州之制青州初履海岱禹貢九州曰海岱惟
青州謂東北跨海西南距岱少陽之方其色爲青故
以名也舜肇十二州以青越海析遼東爲營商制九
有以青爲徐周官職方以徐爲青其東北爲幽州齊
則囊括青州襟帶徐兗幽營非所兼也古之國於此
者少昊之世有爽鳩氏虞夏有季荊商有逢公柏陵
薄姑氏皆爲諸侯周武王克商封太公呂尙于齊未
得薄姑之地成王時薄姑與四國作亂成王滅之益

哈佛大學漢和
圖書館珍藏印

封太公。遂有全齊。漢志曰：齊所以為齊，以天齊也。蓋臨淄有天齊淵，以此建國命名耳。管仲曰：昔召康公命我先君太公曰：五侯九伯，汝實征之，以夾輔周室。賜我先君履，東至于海，西至于河，南至于穆陵，北至于無棣。穆陵即大峴山，或以為泰山南，龜山北之穆陵山，非也。或又以為光州固始縣南之穆陵關，不應如是之遠。元和志云：齊陳二境，置此關以為防禁。隋平陳始廢，然則南北朝之關塞耳。以為古齊履可。蘇秦曰：齊南有泰山，東有琅邪，西有清河，北有渤海，四塞之國，地方二千里，此其疆域也。太公後二十九世，彊臣田和篡齊自立，五世為秦所滅。始皇郡縣天下，始置齊郡，又析置琅邪。沂密秦亡，齊分為三齊。王田都據臨淄，濟北王安據博陽，膠東王市據即墨。

故號三齊。

劉貢父云：益都為天齊，濟南為中齊，沂海為南齊，非是。

漢高初假韓

信繼封子肥為齊王，有齊七十餘城。後置青州刺史

部領齊郡、北海、千乘、濟南、平原、東萊、膠東、高密、淄川

郡國凡九，而不常所理。琅邪、東海則為徐州之郡，遼

東邊郡嘗來屬焉。

光武十三年，以遼東屬青州。二十四年，還屬幽州。

三國時

齊為魏有，晉置青州刺史，領齊國、濟南、樂安、城陽、東

萊、五郡，而理臨淄、琅邪、東莞，亦為徐郡。永嘉之亂，青

及徐州之半陷于劉曜，石勒厥後慕容燕苻秦迭據

其地。秦敗苻朗以青州降，晉改置幽州。以辟閭渾為

刺史，鎮廣固。隆安四年，為慕容德所陷，德稱南燕，定

都廣固。二世為劉裕所滅，西濟東海復為晉土，而祚

移于劉氏矣。劉宋置青冀二州，青理臨淄，冀理歷城。至明帝時，二州及琅邪之地，竝沒于元魏。魏置青齊郡，廢復為州。大業初，州廢，復為北海高密齊郡。琅邪、東萊五郡，唐武德初，郡廢為青齊淄濰牟密登萊沂等州。青齊置二總管府，後罷總管為都督府。貞觀初，罷都督。天寶初，復為北海高密濟南淄川東牟東萊琅邪郡，屬河南道。青州又升平盧節度。石晉青州仍為平盧節度。齊密二州，則為防禦。宋置青密齊沂登萊濰淄八州，屬京東東路。升青州為鎮海軍，密州安化軍，齊州興德軍。元祐三年，安化改臨海軍。政和元

年，鎮海軍復為齊郡。六年，以齊州為英宗賜履之地，升為濟南府。建炎元年，京東路青州為帥府，濟南為

要郡，登萊沂密為次要郡。從李綱所請，京輔之外，建

去干寶所謂非命世雄才不能復取，綱策雖善，豈高宗能辦哉。金人初入中原，詭立

宋濟南知府，劉豫為齊帝，兼八州之地。八年廢之，置

益都、濟南二府，立山東東路統軍司于益都，轄十三

州焉。濰、淄、密、莒、寧海、登、萊、沂、海濱、棣、清、滄。國初，以濟南益都立二帥府

益都，仍行省事。後竝廢，置益都、濟南、般陽三路總管

府，割德州、寧海為隸省之州，四分齊境，立宣慰司于

益都，以鎮之。廉訪司于濟南，以按治之。屬山東東西

道，皆古全齊之地也。其詳則各隨郡縣以載焉。其舊

屬齊邑今割入他郡者亦別附見云

分野

地志曰虛危為齊分星曰元枵宮曰寶鉞時曰子州
曰青魏陳卓分郡國所入宿度齊國入虛六度北海
入虛九度濟南入危一度樂安入危四度東萊入危
九度平原入危十一度淄川入危十四度魯分徐州
屬齊者東海入奎一度琅邪入奎六度高密入婁一
度城陽入婁九度膠東入胃一度又唐一行山河兩
界圖曰河為北河江為南河自北河下流南距岱山
為三齊自南河下流北距岱山為鄒魯皆負海之國
貨殖之所阜也觀兩河之象與雲漢之所終始而分

野可知矣春秋運斗樞曰虛危之精流為青州分為
齊國立為萊山其川淮泗其浸沂沭音述又其利蒲
魚堯之浸曰盧維幽之浸曰菑音述又其利蒲藪曰豸養

山川

禹貢青州曰嵎夷既略濰淄其道徐州曰淮沂其乂
蒙羽其藝嶧陽孤桐皆今齊境山川也取法于經則
沂山見周禮為青州之鎮故冠諸山濰淄二水青之
大川故為眾水之長次則經傳圖志所載與夫古志
或遺而高大可稱者皆在所書其餘則略祠宇古迹
之類因山川而互見者不復重出云

益都山

沂山○臨朐縣南百里周禮職方氏青州其山鎮曰沂山註曰沂水所出乃取名也漢志朱虛縣東泰山汶

水所出酈道元水經曰大弁山與東泰山連麓流水

出焉以二水證之即公玉帶公玉帶濟南人公玉姓帶名玉一音肅見史記

武帝紀註請漢武所封之東泰山也然漢志謂卑小不稱

其聲者蓋沂山遠望之則高壓羣山緣坡麓旁衍八

九十里以漸而升逮至其顛則失其峻極耳又左思

齊都賦云神嶽造天惟此山可以當之疑亦因東泰

山而得嶽名山頂有二冢相傳周穆王葬宮嬪于此

故大峴關因號穆陵云按周初封太公已有南至穆

陵之履豈由穆妃而得名乎蓋二冢不知誰氏之葬

反因穆陵而附會也山半有東鎮東安王廟石刻神

像俗傳趙太祖微時閱韓通于此棄衣而石翁媪收

之神像猶作臂衣之形故又云翁媪廟本即沂山之

神歷代封祀有典碑志具存而俚俗誕妄如此不經

甚矣

大峴山○即穆陵關也沂山東南曰大弁山大弁今人

訛作大屏字相類而誤唐沈亞之沂水襍記又訛作

太平山因頂平八九十里故云當從水經作大弁者

是大弁東南即大峴也其山峻狹僅容一軌故為齊

南天險劉裕伐南燕兵過大峴指天而喜曰虜已入

吾掌中即此山也山北數里有裕祭天五壇

仰天山○臨胸南七十里有黑龍洞縣邑禱雨輒應宋
碑云元符三年勅額靈澤廟崇寧五年封濟侯

逢山○臨胸西十里按路史逢伯陵姜姓炎帝後太姜
所出始封于逢在開封逢澤後改封于齊猶稱逢公
山因名焉有逢公祠漢志云祠逢山石社石鼓于臨
胸山舊有石鼓或擊而有聲則齊亂今不存矣其山
四面斗絕惟一徑可登且有泉金末避兵于此者多
獲免

靈山○臨胸東北廿里晏子春秋云齊大旱景公曰卜
祟在高山廣澤寡人欲祀靈山可乎晏子曰靈山以
石爲身草木爲毛髮天久不雨髮將焦枯身將焚獨
不欲雨乎祀之何益蓋此山也

凡山○臨胸東北三十里大紀云軒轅踐位天下有不
道者從而征之凡五十三征而奄有中區東至于海
登凡山及岱宗西至崆峒登雞頭南至于江登熊湘
北逐葷粥合符釜山竹書云堯放丹朱于丹水朱虛
縣有丹山一名凡山黃帝所禪又名堯山下帶長阪
曰破車峴東西二丹水出焉此山西接靈山東連方
山遙見穹崇近則卑小豈上古之時爲瀕海之山後
漸去海遠耳俗名凡山蓋凡字訛也

雲門山○府城南五里上方號大雲頂有通穴如門可
容百餘人遠望如懸鏡泉極甘冽崖壁上銜蚌殼結

石相傳海田所變如沈存中筆談載太行山崖螺蚌
石子橫亘如帶之類齊地尤多又有碎石子或閒瓦
礫凝結作石殆不可曉蓋蚌石雜沙土凝者水所漬
也石子自凝成石者氣所化也豈天地之終萬物皆
碎爲塵及其開闢漸復凝聚元氣查滓中融化未盡
者猶有其質邪以理逆之無足怪者雲門之東曰劈
山山峯分裂如劈古名劈頭山西則駝山三山聯翠
障城如畫宋熙寧間知青州盧士宗山路記云營丘
東秦舊服周環衆山雲門爲之冠然此山實不聞于
天下其磨崖題刻有宋慶歷八年富文忠公題名七
人熙寧二年歐陽文忠公六人四年趙清獻公二人

吳文肅公奎十一人政和五年安撫使梁子美十七
人金泰和間亦有益都少尹夾谷璋十一人然則雲
門絕景前賢題品尙矣圖經散逸之後乃不得與龍
山虎丘角雄天下爲可惜也故特表而出之云

堯山○三齊略云在廣固城西十里堯巡狩所登遂以
爲名山頂有祠祠邊有柏樹枯而復生不知年代此
山正臨廣固廢城才二三里去今府城乃十里耳唐
開元三年青州刺史王昕碑亦云堯山者齊記謂堯
巡狩所登大歷八年平盧淄青節度使李正己碑云
魏神龜三年青州牧臣沐載建祠及李乾暉碑陰疏
棟宇甚盛今皆不存中統初益都同知劉仁傑始立

廟設像紀石又有宋熙寧小碣凡五碑余按堯狩此山殊不經見府東角崩山與方山相連伏琛齊記亦名堯山水名堯水地名堯溝以堯名者不一鄭康成云堯遊城陽而死葬焉大紀云堯葬城陽丘壠小葬具微前志謂濟陰城陽有堯冢然齊有丹山朱虛丹朱所封而齊之城陽比濟陰尤顯豈堯老而遊者齊莒之城陽歟丘壠微小不存而山川猶表其稱歟

嶼山○府城東五十里水經云康浪水出嶼山堯水逕嶼山東山在劇縣西南無事樹木圓峭孤特左思賦嶼鎮其左是也按齊城山勢俱帶西南東郊平原百餘里有香山者童然孤峙康浪發其南堯水逕其東

卽嶼山也元和志作箕山紀侯冢在山陰宋書云焦恭祭冢得玉磬焉別見巨洋水條下山西南十里有龍女泉辛酉夏旱欽禱此泉投文水中卽日雨露足明年復禱亦如之嘗率村疇欲碑其事疇諾而不集因附此以垂不朽云

牛山○臨淄南十里孟子曰牛山之木嘗美矣齊景公登牛山北顧其國而流涕爲晏子所笑卽此山也又白淵之齊道記曰黃丘北十里有鸞鷲峴下帶長澗東北流經牛山山去此水八十餘里號曰牛頭水是齊景公所登而歎處蓋言爲山濁水耳

嶽山○臨淄南十五里齊風曰子之還兮遭我乎嶽之

齊
閒兮卽此山也漢書作嶲亦作巖與狃通

稷山○臨淄西南十三里隋志曰臨淄有稷山齊記補曰山舊有后稷祠故名又齊宣王嘗立孔子廟亦名孔父山也

愚山○臨淄西二十里桑欽云山東有愚公冢山北有愚公谷按韓非子云桓公逐鹿入谷問一老父此何名愚公谷對曰臣畜牸牛生犢賣之而買駒少年謂牛不能生馬遂持駒去傍鄰聞之以臣爲愚故名愚公谷後人因爲立廟宋元豐間禱澍有感封隱利侯南曰杜山與愚山連阜水經云時水屈而西南有杜山高士傳齊宣王獵于杜山閭丘先生長老十三人

相與勞王王賜父老不租父老皆謝先生獨不拜復賜無徭役又不拜曰望得壽富貴于王王曰死生有命非寡人也倉廩備災無以富先生大官無闕無以貴先生閭丘曰非也選良吏平法度臣得壽矣賑乏以時臣得富矣令少敬長臣得貴矣山有白龍灣神祠宋政和賜額顯貺

商山○臨淄西三十里今隸高苑齊記補云南燕建平三年立冶逮今鼓鑄不絕崔琰述征賦云涉淄水過相都登鐵山望齊密卽此山也寰宇記以爲密州之鐵山者非是

孤山○濰州西四十里有穴曰龍洞禱焉雲出卽雨宋

封山神曰廣靈侯又以孟子言伯夷避紂居此北海之濱因立廟封伯夷清惠侯叔齊仁惠侯崇寧大觀碑刻存焉國朝至元十八年加封山神曰孚澤廣靈侯伯夷昭義清惠公叔齊崇讓仁惠公路史伯夷名允字公信叔齊名致字公遠夷齊諡也此說恐未必然山東曰麓臺俗傳公孫宏讀書處元和志以爲宏墓

陸山○昌邑縣南四十里濰水東岸漢封霍光爲博陸侯食邑北海河東師古曰蓋鄉聚之名非縣也此博陸聚之山耳故名陸山天寶六年勅改霍侯山南有岷山又南峽山皆瀕濰水

浮來山○莒州西三十里春秋公及莒人盟于浮來卽此也俗訛作浮丘山山半有莒子陵又東南馬鬣山又東屋漏山浮來之北則洛山黃華水發源于此合浮來衆水瀦爲莒之西湖湖西復有定林山山有定林寺亦名利也

焦原山○莒州南四十里記云莒有焦原臨百仞之溪人莫敢近莒勇士登焉莊子伯昏瞀人射臨百仞之淵卽此漢志謂之崢嶸谷俗曰青泥街兩峽峻立如街故云

靄山○沂水縣西北三十里寰宇記山出紫石英好者暎徹如靄故名亦作峒山今日峒突固又東北螳螂山與大小二魯山相連有穴如門直入二十里眞仙

境也縣西四十里有磨石峴長二十餘里極險峻峴下卽堂阜鮑叔解管仲囚處俗訛作憚阜

高柘山○沂水東北百里漢志靈門有高柘山浯水所出東入濰又名巨平山俗曰臺頭山

望仙山○沂水西南百里縣中有望仙橋以為王喬飛

鳥之地未詳

按列仙傳仙人王喬同姓名者有三人吹笙王子晉一名王喬在周飛鳥王喬

在葉縣食肉芝王喬在益州北平山在齊地琅邪者無之俗附會耳

蒙陰山○蒙陰縣南八里今名仙洞山琅邪承宮避亂

此山立性好仁不與物競人有認其禾者舍之而去

龜蒙二山○魯頌閟宮曰奄有龜蒙遂荒大東傳曰龜

蒙魯國二山也龜山近魯在今費縣西北七十里後

人指為蒙山者山頂宛如龜形名不虛得夫子龜山

操曰余欲望魯兮龜山蔽之韓退之擬曰龜之大兮

祇以奄魯則龜為魯之大山明矣蒙山者在龜山東

二山連屬長八十里禹貢之蒙羽論語之東蒙此正

蒙山也邢昺曰先王封顓臾為附庸之君使主祭蒙

山蒙山在東故曰東蒙後人疑于東蒙之說遂誤以

龜山當蒙山蒙山為東蒙而隱沒龜山之本名夫魯

人頌其本國之山川辭必審矣故今定蒙山為龜山

東蒙為蒙山以復古焉

帝王世紀少昊自窮桑都曲阜註謂窮桑在東蒙山屬魯

地然未知果是否

龜山下有古顓臾城山前玉虛宮唐仙人

賈神翁所建有英烈昭濟惠民王祠卽顓臾也山西

南十餘里有漏澤澤有五穴春夏積水秋冬漏竭將

漏之時先有聲居人扈穴取魚隨種麥比水至麥已

收矣費縣解有唐大中間校書郎李潛漏澤賦并序

石刻宋至和間出于泥中今斷裂為二在醉翁亭記碑傍醉翁碑者歐公同時人蘇唐卿為費縣蒙宰篆記文刻石立于此并刻歐公往復手帖皆精

山前陽口村有玉皇廟相傳老萊子故宅也陽口亦

山名後魏費縣理此高士傳老萊子隱蒙山著書十

五篇言道家用楚王嘗至其門其妻挾薪而至怪

車馬跡之多曰可食以酒肉者可加以鞭捶可授以

官祿者可隨以鈇鉞先生受人官祿為人所制妾不

能為人所制也夫婦遂相與逃去路史又云老萊子

賴賴乃萊也孔子至楚見老萊子時已二百餘歲斑衣戲母側所問答皆禮事知非二人未知是否

羽山○地記舊在胸山縣西北九十里今屬沂州東南

百二十里殛鯀山也前有羽潭一名羽池左傳鯀化

為黃能入于羽淵即此淵傍生細柳野獸不敢踐郡

國志又云鍾離昧城南有羽泉亦殛鯀處其水恆清

牛羊不飲

艾山○左傳隱六年公會齊侯盟于艾杜註泰山牟縣

東南有艾山在今沂州城西三十里與大小鳳凰山

相近官溝水自小沂分流經艾山西注山前靈鎮侯

廟山東漢厚丘縣古城城西有酺神廟詳見祠宇

君山○一名抱犢山嶧州北六十里述征記曰承縣君

山有抱犢固壁立千仞去海三百里天氣澄明宛然

在日山上有池深纔數尺水旱不增減平田數頃昔有隱者王老抱一犢于上耕種後遇異人仙去故以名焉漢曰樓山魏號仙臺其高九里周四十五里然今嶧州城北三里別有仙壇山亦奇秀豈卽仙臺而誤爲君山所掩邪

魯卿山○嶧州東北七十里國語季文子相宣成二君妾不衣帛馬不食粟魯人思其遺惠爲之立廟亦名季山俗作神峯山

夾山○嶧州北七十里通典東海懷仁縣有夾山春秋之夾谷也左傳定十年公會齊侯于祝其實夾谷孔子相漢有祝其縣

禹貢別州以山川定經界秦漢以降建置雖不常亦不敢失山川之限焉按抱犢魯卿諸山古圖經皆屬嶧州今則竝屬沂州訪之耆舊云李瓊據齊以其姻親胡某者知沂州實張威福嶧州畏其逼盡割州東二十里外境與之逮今不改嗚呼瓊賊據彈丸之地爲政不平如此固不足責職方氏因之豈矇不知邪尼丘山○滕州鄒縣東北六十里有坤靈洞宣聖廟其東顏母山水經謂之防山防墓崩卽此有顏母廟南有昌平山夫子所生之鄉又南馬鞍山有孟母墓又南唐口山有孟子墓

鳧山○鄒縣西南五十里闕宮曰保有鳧嶧遂荒徐宅

傳曰鳧嶧二山名也古有伏羲廟今云有伏羲墓按左傳顓臾風姓伏羲之後實司太昊之祀鄒魯有廟是也伏羲都陳有墓非也今訛作爺娘山

嶧山○鄒縣東南二十里京相璠曰嶧山在鄒縣繹邑之所依山東西二十里高秀獨出積石相臨殆無土壤石閒孔穴洞達相通有如數閒屋者俗謂之嶧孔避亂入嶧外寇雖衆無所施害永嘉之亂太尉郗鑒將鄉曲千餘家逃此今山南有大嶧名郗公嶧亦有古城遺跡史記始皇二十八年東行郡縣上鄒嶧山刻石頌德三代地理書曰始皇乘羊車登嶧山刻石處名曰書門

桃山○滕州南五十里御覽云卽華采山也又名義珠山山上有井不可窺窺者不盈歲輒死有鳥巢井上金喙黑色見則大水今訛作陶山謂有陶朱墓西微山謂有微子墓皆謬惟奚公山奚仲造車處上山軌轍猶存見地記云

牟婁山○密州安丘南二十里路史云古有巢氏治石樓山卽牟婁也本牟夷國密之諸城有婁鄉隋因置牟山縣今訛作朦朧按字書云牟婁微視也義或緣此

常山○密州南二十里東坡雩泉記曰禱雨未嘗不應蓋有常德者故謂之常山廟西南十餘步有泉古者

謂吁嗟而求雨曰雩名之曰雩泉宣和閒封山神靈
濟昭應王

廬山○密州東南四十五里東坡詩註盧敖秦博士避
難此山遂得道有盧敖洞飲酒臺聖燈巖障日峯三
泉

馬耳山○密州西南六十里東坡詩試掃北臺看馬耳
未隨埋沒有雙尖北臺謂超然臺也

九仙山○密州東南百二十里坡云九仙在東武奇秀
不減鴈蕩所謂九仙今已壓京東是也漢琅邪郡有
太一仙人祠

九所豈以此得名邪

琅邪山○密州東南百五十里齊景公放于琅邪卽此

吳越春秋越王句踐徙琅邪立觀臺以望東海秦始皇
皇廿八年南登琅邪大樂之畱三月徙黔首三萬戶
于臺下立石頌德御覽云碑有六百字可讀臺側有
四時祠臺上有神泉人或汚之卽竭漢于此置琅邪
縣武帝亦嘗登焉隋開皇十六年于此置豐泉縣大
業初復爲琅邪唐省之今山下井邑遺跡猶存登山
石道如故土人名曰御路

大朱山○膠州西南百二十里岸海名山也通典高密
諸城縣有古齊長城自大朱山起蓋古齊長城起自
齊西防門東逾泰山穆陵至大朱山海濱而絕非起
自大朱也大朱山有石室晉永嘉中陳仲舉隱此得

齊記 卷之一 五
道仙去旁有小朱山錯水所出又東徐山方士徐福
將童男女二千人會此入海采藥不返又東白貌山
風水所出錯水風水俱東入海

大小二勞山○卽墨東南六十里岸海名山也又名勞
盛山四極明科云軒皇一登勞盛山是也齊記云泰
山自言高不如東海勞吳王夫差登之得靈寶度人
經神仙傳樂子長遇仙人授以巨勝赤散方曰蛇服
此藥化爲龍人服此藥老成童子長服之年百八十
歲顏如少女登勞山仙去山高十五里周八十里此
大勞也與小勞山華樓山疑卽陰山鼎足相聯大勞山有
上清宮五代末華蓋仙人識趙太祖于側微宋人爲

建此宮近世有劉使臣者棄金符遯此山其徒建碧
落宮

陰山○卽墨東南八十里上有小池深不盈尺水旱不
增減池傍有石人并石馬蹄迹寰宇記云秦始皇至
牢盛山望蓬萊立馬此山遣石人驅牢山不動因立
於此石人今海濱山上往往有之蓋勞山之高以其
登陟之難則名勞
驅之不動
又名牢也

不期山○卽墨東南四十里又名訓虎山後漢童恢爲
不期令有虎食人恢檻獲二虎訓之曰王法殺人者
死虎敢食人一虎垂頭服罪一虎吼躍不服服者殺
之躍者縱之三齊記云鄭元教授此山草生如籬長

尺餘堅韌異常號康成書帶余按勞山不期皆康成
講學之地文澤涵濡草木爲之秀異千載之下芑茅
塞焉深可歎已

天井山○卽墨東十餘里上有一井極甘因號天井北
二十餘里平地三穴湯泉出焉若有風從西北來則
湯極熱不可入

女姑山○卽墨西南三十里山北舊有基漢志不期太
一仙人祠九所及明堂武帝所起不期城西南有七
神號曰女姑卽此又東有中祠山亦九祠之一又天
室山亦祠所竝見寰宇記

田橫島○卽墨東北百里橫衆五百人死此四面環海
去岸二十五里可居千餘處蓋有竹島塔沙福島穀
積車牛皆海中島名然登州蓬萊閣西復有田橫島
在岸不在水非是

寧海山

大崑崙山○州東南四十里嶠夷岸海名山也秀拔爲
羣山之冠仙經云姑餘山麻姑于此修道上昇餘趾
猶存因名姑餘後世以姑餘崑崙聲相類而訛爲崑
崙然今東夷人止名崑崙又有小崑崙與之相連宋
政和六年封仙姑虛妙真人重和元年賜號顯異觀
元遺山續夷堅志崑崙山石落村劉氏嘗于海濱得
百丈巨魚取骨爲梁構屋曰鯉堂堂前一槐蔭蔽數

齊東野語 卷之一
畝忽夢女冠自稱麻姑乞此樹修廟劉漫許之後數日風雷大作昏晦如夜失槐所在相與求之麻姑廟中樹已臥廟前矣山有東牟侯神祠又金大定閒關西王祖師訪山前大姓于氏曰我前生修煉此山山有烟霞洞益往登焉于氏以爲我世居此未聞有洞相與登山求之果見洞口有烟霞字跡大爲神異建祠紀石焉

盧山○州東二十里與大峴山東牟山相連北至海百里上有望海臺峴山有東牟侯祠又東繫馬山始皇于此繫馬草生猶作繫結之狀俗云繫馬碣州西南六十里兩碣山兩峯碣側相倚竝見寰宇記

文登山○文登縣東二里寰宇記始皇東巡召集文人登此山論功頌德故名又東有鶴鷗山常有鶴鷗栖其上

斥山○文登東南六十里爾雅云東北之美有斥山之文皮焉蓋以海濱廣斥得名高門之族居此有千餘家東齊于氏皆斥山望也欽之曾大父端叔府君自斥山徙昌陽大父君瑞府君其仲子也又自昌陽徙益都先考禮部公嘗命欽攷斥山于氏所出欽對曰按氏族略于氏本周武王子邴叔所封之國在河內邴城子孫以國爲氏去邑爲于後魏時有自東海隨拓拔徙代改爲萬紐于孝文復爲于氏又有淳于姜

姓之後唐避憲宗嫌名亦爲于氏此鄭氏之說也然
 史記文王伐邾在野王縣西北書大傳正作于于蓋古諸侯
 之國非始于邾叔也又夏相時于夷來賓子欲居九
 夷于夷其一也或卽嵎夷之轉或于國之裔有奔海
 濱而君長東夷者何其族之蕃而世之衍也斥山之
 于祖此爲的先君領之

之朶山○州西北五十里海濱史記秦始皇廿九年登
 之朶刊石紀功三十七年又自琅邪使徐福采藥福
 言苦大魚爲患於是連舟下海登之朶射巨魚郊祀
 志齊有八祠之朶爲陽主山有陽主廟武帝太始三
 年幸琅邪禮日成山登之朶稱萬歲子虛賦又云射

乎之朶其山入海中有壘石相傳武帝造橋兩石銘
 猶存山高九里周五十里西南至福山縣長三十餘
 里

召石山○文登之東三齊略云始皇造石橋渡海觀日
 出處有神人召石下城陽一山石岌岌相隨而行石
 去不駛神人鞭之見血今召石山石色皆赤伏琛齊
 記曰始皇造橋觀日海神爲之驅石豎柱始皇感其
 惠求與相見神曰我醜莫圖我形當與帝會始皇從
 橋入海四十里與神相見左右有巧者潛以足畫神
 形神怒曰帝負約可速去始皇轉馬前腳纔立後腳
 隨崩僅得登岸今驗成山東入海道水中有豎石往

往相望似橋柱之狀又有柱石二年出乍没琛云始
皇渡海立此石標之以爲記山下有海神廟望海臺
始皇廟

成山○文登東北百五十里古不夜城側漢志亦作盛
山主祠曰盛山斗入海最居齊東北陽以迎日出武
帝太始三年幸東海作朱鴈之歌禮曰此山還而下
郵鰥寡今按召石與成山相近因始皇會海神故後
世遂呼成山曰神山山斗入海旁多椒島海艘經此
失風多覆海道極險處也

鐵官山○文登西百四十里去牟平城百里漢置鐵官
冶鑄遺跡尙存

五壘山○文登南五十里南北成行入海如壘又南石
門山兩石聳立如門今按文登正南有鐵查山東連
斥山甚奇秀圖經弗載豈古與斥山爲一或卽五壘
石門之異稱歟

白鹿山○文登北四十里唐神龍三年刺史畢元愷於
此獲白鹿進之故名又東北海邊有雞鳴島北海中
有海牛島郡國志云海牛無角長丈餘紫色足似龜
尾若鮎魚性捷疾見人則飛赴水皮堪弓韃脂可然
燈與海驢島相近海驢常以八九月上島產乳其皮
水不能潤可以禦雨竝見寰宇記海驢皮今有獲之
者淺毛灰白作鱸魚斑又有海狸亦上牛島產乳見

齊記

昌山○文登西南四十里有巨神島龍祠昌水出此山因氏焉南合黑水北納昌陽湯通名昌水西南過萊陽會五龍水南入于海昌陽湯極清溫在文登西七里名如意湯圖記文登有溫泉七所此爲最

般陽山

九目山○登州東南七十里齊記云山有九竅故名北二十里有龍山又北羽山之朶水所出東北流合石門水入海寰宇記亦謂此爲殛鯀之山非也東海旣有羽山鯀廟矣此偶同名耳又有朱高密神隱丘歷堂等山圖志弗載不可備述

沙門島

附海市

○登州北海中九十里上置巡檢司海艘

南來轉帆入渤海者皆望此島以爲表誌其相聯屬則有鼉磯島牽牛島大竹島小竹島歷歷海中蒼秀如畫海市現滅常在五島之上海市之名始見江鄰幾雜志東坡詩序或謂類南海蜃樓蛟蜃噓氣所成殆不然欽嘗至登州海上訪之蓋海市常以春夏晴和之時杲日初升東風微作雲腳齊敷于海島之上海市必現現則山林城闕樓觀旌幢羶車駝馬衣冠人物凡世間所有象類萬殊或小或大或暫或久或變現終日或際海皆滿其爲靈怪赫奕豈蜃樓可擬哉蓋滄溟與元氣呼吸神龍變化浩不可測如佛經

所謂龍王能興種種雷電雲雨居于本宮不動不搖
山海幽深容有此理欽以中秋後至海濱天已微寒
知州事李述之詩人也亦相與禱于廣德王之祠越
二日忽報云今晨風色雲氣海市當現同登賓日樓
候之日初出大竹島上橫一巨艘長餘百尋述之指
以示余余曰此海舟耳述之曰諦觀之何故不動須
臾前後曳數旗劔戟紛紜忽不見惟有空舟漸變如
長廊而滅述之曰風稍急而寒不然現未已也嗚呼
神哉然則史漢所稱三神山蓬萊方丈瀛洲望之如
雲未能至者殆此類耳且秦漢入海方士僅能往來
于磯島之間偶見此異慕之爲仙亦不爲過非若今
人航海遠泛黑水洋外或飄蕩歲月而後返果有蓬
萊仙山何不聞也斯言足破千古之惑矣

金山○亦名岬嵎山棲霞縣東北二十里以產金得名
卽地記萊陽縣之黃銀坑也隋開皇十八年牟州刺
史辛公義於此坑冶鑄得黃銀獻之山寺有隋碑淘
金者所祖然隋唐以來皆守土官采以充貢爲數不
多未見其害今則編戶置官歲定金額有增無減三
時沙汰僅得分毫名曰淘金實則買金鑄納戶漸逃
亡官復侵剝大約金戶一家之賦當他戶三倍之多
而戶不勝其苦矣又指以金苗鑿地人居宅墳壠
皆所不免而民不勝擾矣其害視嵯窰有加夫宏羊

之罪良史已書辛公義作備此毒可無誅乎故論及
之土俗訛傳隋開皇中岨嵎山出黃金九屋俗儒便
紀之于石爲可笑也

艾山○棲霞西北三十里山前溫泉可浴按棲霞縣本
以山得名曰百澗北曲方嶺唐山靈峯覆甌積金芝
陽公山棊山磁山哈壚山

哈壚在福
山縣南

不能具述大抵

環縣皆山耳宋李常云吾州有重巖疊嶂不可名狀
信然

萊山○黃縣西南五十里封禪書云齊八祠萊山爲月
主山有月主真君祠一云萊陰山多仙聖所居

蹲狗山○黃縣西南三十里上有石如狗蹲伏氏云山

極靈劉寵微時途經此石犬吠之後爲太尉俗名狗
兒山

蘆山○黃縣南四十里山下有真君宮金縣尹陳公碑
云蘆童子晉時人九歲居此山食茯苓升仙唐封沖
禧真君

三山○萊州北二十里漢志秦祠八神四曰陰主祠三
山寰宇記云在掖縣北海之南岸顏監謂卽三神山
者非也漢志曰蓬萊方丈瀛洲此三神山者其傳在
渤海中則三神乃蓬萊方丈瀛洲之總稱豈海岸之
三山也詳見海市論

浮游島○萊州北海中望若浮游然俗訛曰芙蓉

福祿山○萊州西五里出溫石可爲器又有金山馬鞍
優游雄山土山君山皆縣境內

萬里沙○萊州北三十里夾萬歲水兩岸沙長三百里
路史云雲陽氏陽帝處于沙掖有萬里沙祠秦皇漢
武皆禱于此又北十餘里臨海有盞石方圓五步上
有窪樽古老相傳始皇鑿此盛酒以祭百神

大基山○萊州東十里金明昌間劉國樞記云大基山
道士谷後魏鄭文公修道之地流泉花竹地占高敞
略無纖塵郡之甲勝

七子山○萊陽縣東南九十里山有八峯大峯居中餘
若子然故曰七子

五龍山○萊陽南二十里四水自西北昌水自東北皆
南流至山前五水相合名曰五龍南入于海山因名
焉西有荆山寰宇記作蕤山爾雅藿山蕤者是也

高麗山○萊陽西南九十里司馬懿征遼東置戍于此
以高麗爲名俗訛作差峩山

火山○萊陽北三十里山多赤石故以火名已上竝見
寰宇記又有倉山林寺福阜三山

林寺福阜
淘金之地

又有獅

子峯俗傳金人詩俚甚今不取

大豁山○膠水縣西北二十里伏琛云盧鄉城東南有
豁口曰大豁山北又有小豁山

嶺岬山○膠水北三十里寰宇記云山形嶺岬故名北

與蹲狗山相接天柱大澤皆一帶山也

明堂山○膠水東北四十餘里齊記云盧鄉城東三十里有明堂山與巨青山連出烏頭天雄又云藥石水出此合石瀆水北入于海

墨山○膠水東北六十里石色如墨故名水出茲山亦名墨水

金泉山○膠水東南四十里記云出桔梗防風

鳳喙山○招遠縣北三十里本名牛心至元六年陳節齋按部過之以其名俚故易之有詩石刻在縣治縣北五里有湯泉阜泉出阜南極熱東流合冷泉入池始可浴鳳喙山東有山中空俗曰虛空山又有齊山

望兒亦皆鄙俚自圖經散逸齊地山川例蒙俗惡之稱惟密州境內一山一水名存古雅蓋得坡仙手滌凡陋千載有光信賢人之澤遠矣

梓桐山○般陽府城東十餘里後有石壘園洞古老相傳鬼谷子隱居名鬼谷洞典略鬼谷弟子蘇秦張儀輩五百餘人鬼谷為作窟深二丈日有能在窟中說使泣者則能分人主之地矣秦下說之鬼谷泣下即此洞亦有鄭康

成廟金末燬于兵乙卯歲淄川令張孚重修澠水燕談云處士王樵隱此山詳見人物論梓桐東曰吉磨山出磨石有石碌井

原山○府東南七十里地志云原山淄水所出今名岳陽山淄出其陰汶出其陽非止一水也山亦跨淄川

齊東野語 卷之一
益都兩縣界云

甲山○府西南三十里水經註萌水出般陽西南甲山
東北入瀧水今訛作夾谷山謂是齊魯會盟之地非
也當從水經

鬲山○府北十里三齊略云鄭元刊註詩書棲遲此山
上有古井獨生細草葉似薤俗謂鄭公書帶卽今鬲
堂嶺與長白山相連元遺山濟南行記謂因范文正
公學舍在焉故謂之鬲堂蓋未見古圖經耳

長白山○長山縣南三十里太平御覽云長白山者因
此山雲雨長白故名之西南又有大湖山二山竝有
石室敗漆船上有記皆謂堯時物元和志云於陵城

西長白山高二千九百丈周六十里昔陳仲子夫妻
隱此山阿有醴泉寺相傳志公卓錫之地宋范文正
公讀書寺中日惟一粥偶見窖銀覆之而不取後爲
西帥僧人求爲修寺公使發之取窖中銀適周於用
此與還術者子白銀相類世或未之聞也上下二書
堂在鬲堂嶺會仙峯下皆宋代所建遺跡尙存今卽
寺內有范公祠舊說公母嫁齊居秋口公讀書此山
相去百里往來省親劬甚後知青州悲思不自勝秋
口在今顏神鎮土人亦名其處爲范公書堂按南岱
東沂山小泰之外沂之蒙山密之九仙卽墨之大小勞
寧海之姑餘般陽之長白皆三齊高大名山也餘不

得竝列

濟南山

歷山○府南五里一名舜耕山古有舜祠曾南豐齊二堂記云舜耕歷山漁雷澤陶河濱作什器于壽丘就時于負夏鄭康成釋歷山在河東雷澤在濟陰負夏在衛地皇甫謐釋壽丘在魯東門之北河濱在濟陰定陶西南陶丘亭是也以余考之耕稼陶漁皆舜之初宜同時則其地不宜相遠孟子又謂舜東夷之人二家所釋雷澤河濱壽丘負夏皆在魯衛之間東方之地歷山不宜獨在河東在齊者是也世因河東雷首山一號歷山瀉水所出舜娶堯女所居遷就附益

謂歷山為雷首之別號不考其實由是言之則圖記

皆謂齊之南山為歷山舜所耕處故其城名歷城為

信然也或者不此之論乃備載陸魯望象耕鳥耘之

辯可見其贅龜蒙曰世謂舜田歷山象為之耕鳥為

深似象步耘者舉疾而畏晚如鳥喙通典云山有太甲冢未詳歷山南

屬泰山東連琅邪崇岡疊嶂脊脈不斷欽嘗有詩云

濟南山水天下無晴雲曉日開畫圖羣山尾岱東走

音奏海鵲華落星青照湖此濟南山勢也

廟山○府城東南十里三齊記云因舜廟得名遺山濟

南行記作妙山非是

函山○府南二十里按酉陽雜俎云齊郡函山有鳥名

王母使者漢武登此山得玉函帝下山玉函化爲白鳥飛去世傳山上有王母藥函鳥常守之因號函山有九十谷又名臥佛山

奎山○府城西南十五里三齊記奎山公神似猪頭戴珠冠殷時有道士隱此野火四發道士祈天卽雨今人遇旱燒山禱雨多應又北有匡山世傳太白讀書於此又北曰粟山曰藥山山出陽起石極佳故名

華不注山○府東北十五里左傳成公二年魯季孫行父帥師會晉卻克及齊頃公戰于鞏齊師敗績逐之三周華不注又云從齊師至于靡笄之下逢丑父與公易位使公下如華泉取飲則此山亦名靡笄靡與摩同

地記又名金輿道元謂單椒秀澤不連丘陵以自高虎牙傑立孤峯特拔以刺天青崖翠發望同點黛信然山前道院中有石刻太白諸賢詩院前卽華泉水與小清河流

鵲山○府北二十里王繪太白詩註云扁鵲煉丹于此俗又謂每歲七八月烏鵲翔集故名按扁鵲盧人近在今長清縣地煉丹此山者是古有鵲山院見陳後山詩

黃山○府西南六十里山周如城岱陰諸谷之水奔流至山西匯爲池圍數畝不溢而伏山卽渴馬崖也伏流至府城之西而出卽趵突泉也

西龍洞山○府南六十里道元云苻秦時有竺僧朗事

佛圖澄碩學淵通與隱士張巨和居此因號朗公谷
 今有朗公寺亦三齊名刹歷代有碑谷有琨瑞溪水
 過玉符山又名玉水至祝阿入濟今溪水東西分流
 山中人云西發趵突東發百脈驗之信然謂徑入濟
 者誤也龍洞西南有方山長清縣界疑即水經之玉符山
 又西隔馬山長清東南左傳襄公十八年晉伐齊齊侯禦
 諸平陰塹防門而守之廣里齊師懼夜遁夙沙衛連
 大車以塞隧而殿殖綽郭最曰子殿國師齊之辱也
 子姑先乎乃代之殿衛怨二子遂殺馬于隘以塞道
 欲使晉師得之即此後人呼為隔馬山山東北曰神
 林有隔馬神君祠祠南有一潭清澈見毫髮歲旱邑

人祈聖水禱雨輒應唐宋碑刻存焉又南青崖山金

亂巖侯幸義兵堡此皆古齊山今屬泰安

東龍洞山○府東南三十里山如重甌音言甌也爾雅重甌慊此山類

之西洞透深一里許秉火可入東洞在萬仞絕壁之

上洞口釜鬲尚存烟火之跡如墨蓋昔人避兵引絙

以上中必有泉不知其深幾許耳有翠屏巖獨秀峯

三秀峯峯側龍祠郡邑禱雨極應宋封靈虛公九域

志又云禹登山謂禹治水嘗登

龍盤山○章丘縣南二十八里齊記云周初有神龍潛

此山遂名有神跡祠姜嫄所履伏琛云宋濟南太守

蕭承之立祠山上其妻亦學履而產齊帝按姜嫄炎

齊
卷之一
三
帝後有駘氏之女高辛世妃后稷母也駘舜封稷作
郃元和志郃在京兆武功縣路史駘在費縣南遠者
去此數千里近亦五百餘里姜嫄未嫁不應至此旣
嫁則高辛都亳河南偃師地豈在齊乎伏琛之論尤
覺誕妄

樂盤山○章丘南二十七里齊記云下有樂盤城卽平
陵王與章丘侯餞送之地

東陵山○章丘南二十八里龍盤山相連寰宇記云盜
跖死處山南有盜跖冢

危山○章丘東北五里寰宇記云漢文帝十六年封齊
悼惠王子爲齊孝王景帝三年孝王與吳楚通謀自

殺葬于此墓在山椒

女郎山○章丘東南七里又號小田山齊記云章亥有
三女溺死葬此有三陽洞俗云有子張墓卽章女冢
所謂章丘者耳

雞山○章丘西南四十里齊記云有神雞晨鳴于此候
之獲一石潔白如玉因以名焉巨合水出此山下俗
名雙女泉

湖山○章丘正南五十里明秀鄉相傳古有仙翁仙婆
修道此山皆得壽考今有公婆廟遇旱禱雨卽應

亭山○章丘西南六十里桀死處湯放桀于南巢書傳
皆謂今廬江巢縣獨尸子云放之歷山豈古有巢氏

治琅邪之石婁山齊地亦有南巢邪又桀死後其子
淳維妻其衆妾遁于北野隨畜轉徙號曰葷育若桀
死南方其子豈能北遁自齊奔漠則易矣隋唐有亭
山縣見古蹟

啞婦山○鄒平縣西十三里俗呼啞婦山謂夫子去齊
道此山婦人陽瘖以滅跡蓋因孔子去魯之歌曰彼
婦之口可以出走而附會此名直野語耳

大山○無棣縣東北八十里

小山○無棣西北一百二十里二山圖經弗載然濱棣
瀕海廣斥無高峻之山故志

平原嶺○德州東南七十里有望遠臺壽公菴嶺上鹿

角關

齊乘卷一

臨桂胡德琳書巢校

齊乘卷一考證

沿革

商制九有以青爲徐。按爾雅釋地齊曰營州郭注云自岱東至海此蓋殷制邢疏云此營州則青州之地也是商之九州以青爲營于氏以濟東之徐當之誤分野

唐一行山河兩界圖。新唐書天文志引作兩戒古字通用

沂山

酈道元水經曰大弁山與東泰山連麓沬水出焉。當作水經注後凡引酈注直稱水經者放此

仰天山

崇寧五年封濟侯。按山川神祠封號鮮有用一字者。據臨朐縣志作豐濟侯。

嶼山

元和志作箕山。按太平寰宇記作箕山非元和志

愚山

桑欽云山東有愚公冢山北有愚公谷。按水經注時水西北逕黃山東又北歷愚山東有愚公冢時水又屈而逕杜山北有愚公谷于氏割山東山北屬下句失其讀矣且此酈道元之言不關桑欽也。水經三國時人作非桑欽欽西漢末人班氏地理志引欽說

者六不言其有水經也自唐藝文志以水經為欽作後人多承其誤惟此條以酈注屬之桑欽尤堪詫異耳

商山

崔琰述征賦云云即此山也寰宇記以為密州之鐵山

者非是。按太平寰宇記臨淄縣鐵山引崔琰述征

賦云涉淄水過相都相都謂斟灌國故城在壽光縣東登鐵山望齊

密即此山又于安邱縣鐵山下別引崔琰述初賦序

云琰聞比鄭徵君者名儒善訓遂往造焉涉淄水歷

杞焉過杞都之津登鐵山以望高密兩賦題目不同

而皆有鐵山之名封演聞見記云漢末崔琰于高密

從鄭元學遇黃巾之亂泛海而南作述初賦則其為密州之鐵山明矣杞都之津謂安邱淳于城東北濰汶兩川所會也述征賦或別指臨淄鐵山而言然其文在相都之下亦于道里不合于氏以在青者為是在密者為非未詳考也

桃山

御覽云即華采山也。太平寰宇記作華菜山御覽同大小二勞山

又名勞盛山。顧氏曰寰宇記秦始皇至勞盛山望蓬萊後人因謂此山一名勞盛誤也勞盛二山名勞即勞山盛即成山史記封禪書七曰日主祠成山成山斗入海漢書作盛山古字通用齊之東偏環以大海

海岸之山莫大于勞成二山故始皇登之古人立言尚簡南勞而北盛則盡乎齊東境矣

齊記云泰山自言高不如東海勞。元和郡縣志引作太白自言高

召石山

不言去縣里數寰宇記云在縣東八十五里

三齊略云始皇造石橋渡海觀日出處有神人召石下城陽一山石岌岌相隨而行石去不駛神人鞭之見血今召石山石色皆赤。按藝文類聚引三齊略記曰始皇作石橋欲過海觀日出處于時有神人能驅石下海城陽一山石盡起立嶷嶷東傾狀似相隨而行石去不速神人輒鞭之盡流血石莫不悉赤至今

亦爾今于氏引此文城陽上失一海字語意不明又按寰宇記作下城陽一十三石遣東下岌岌相隨如行狀城陽山石豈有定數恐亦誤也

金山

黃銀坑。按山海經注黃銀出蜀中與金無異但上石則色白新唐書地理志昌陽縣東百四十里有黃銀坑貞觀初得之房杜列傳帝嘗賜元齡黃銀帶曰如晦與公同輔朕今獨見公泣然流淚曰世傳黃銀鬼神畏之更取金帶遣元齡送其家是黃銀乃銀之別種非黃金也以金爲通名則可耳元史世祖本紀至元五年閏月令益都漏籍戶四千淘金登州棲霞縣每戶輸金歲四錢此于氏所謂歲定金額者也

萬里沙

窪樽。太平寰宇記作汚樽音義與窪同

五龍山

西有荆山寰宇記作葑山爾雅葑山葑者是也。按寰宇記葑山多葑菜爾雅云葑山葑也今于氏不言山多葑菜而但引爾雅釋草之文非寰宇記本義矣音葑

音本或作葑傳寫之譌

甲山

水經注萌水出般陽西南甲山東北入瀧水。瀧今本作隴朱謀埠箋云疑當作瀧水有隴雙二音按水經

注近世絕少善本于氏所見蓋與今本不同第二卷
籠水條下放此

華不注山

左傳從齊師至于靡笄之下則此山亦名靡笄。顧氏
曰齊乘華不注亦名靡笄山非也左傳云從齊師于
莘云六月壬申師至于靡笄之下云癸酉師陳于鞍
曰逐之三周華不注曰丑父使公下如華泉取飲其
文自有次第鞍在華不注之西而靡笄又在其西可
知金史長清縣有劇笄山。又按史記晉世家晉伐
齊戰靡下徐廣曰靡一作歷故或以歷山為卽靡笄
山要之非華不注之異名也

東龍洞山

宋封靈虛公。按宋元豐二年封龍洞神為順應侯敕
牒碑今尚存豈元豐後又加封公號與

亭山

桀死處。按尚書正義曰周書序有巢伯來朝鄭元云
南方之國桀之所奔蓋彼國也以其國在南故稱南
耳是則桀奔巢國加南字以別于北方之巢有巢氏
都或云
在琅邪或
云在隰州其不在齊地明矣于氏多附會此尤其顯
然者

齊乘卷之二

益都于欽思容纂

益都水

濰水○水經云出琅邪箕縣濰山許慎呂忱云箕屋山

淮南子云覆舟山廣異名耳實一山也今清風山在莒州

莒縣北百里漢箕侯國地東北流逕仲固山折泉水

入焉折泉出松山漢有折泉縣又東北逕密州城西

折而北涓水合扶淇水入焉涓水出馬耳山扶淇出

常山竝見水經今名于齊河又北盧水入焉盧一名

久台音怡水出盧山漢橫縣之故山也道元謂盧水側有不灰木野火

燒死炭不滅又東北至巴山密水入焉密又名百尺有二

源一出障日山東坡所謂小峨嵋者一出五弩山今作

鹵山又東北浯水入焉高柘山今名臺頭出高柘山今名南清河

東北納荆水三齊記昔人堰浯水入荆溉稻田萬頃荆水出荆山逕平昌

故城臺下合電泉入浯道元謂澠水過平昌臺下有井與荆水通有龍出入其中

土人謂其城曰城陽城臺曰城陽臺電泉者又北逕

泉湧如電有龍祠宋封靈霈侯疑即古龍井又北逕

龍且冢冢在澠水東岸五里淮陰囊沙處也道元謂高密碑產

山西古人堰澠水以溉田散流入夷安潭亦此地今

密西有古堤南起岑冢北至蔡冢長三十餘里謂是高

岑彭與蔡伯喈冢非也正古堰遺跡土人名曰趙貞高

女防夷安潭今名又北逕城陰故城西又北至安丘

都樂古奚養澤也又北逕城陰故城西又北至安丘

東北古淳于城側汶水入焉又東北過昌邑又東北

入于海漢志澠或作淮故俗亦名淮河

淄水○書傳曰出泰山郡萊蕪縣原山之陰東至博昌

入海按地志水黑為淄元和志云俗傳禹理水功畢

故謂之淄水也出今益都縣顏神鎮東南二十五里岳陽山

東麓地名泉河古萊蕪地岳陽即原山也東北流逕

萊蕪谷又北逕馬陵俗名長峪道按此即晉郤克追

一作馬陵俗以為是出峪東流聖水入焉聖水出家桑

龐涓之馬陵非是谷又曰神泉列仙傳鹿皮公所飲者見水經又東北

逕牛山折而北天齊淵水入焉又北漸平臨淄東城

又東北逕安平故城北又東北逕樂安縣東古廣饒

地又北入巨淀今清水泊又北出注馬車瀆今高合時水

預謂淄入汶班固謂淄入濟桑欽謂淄入海考其形勢當以杜爲正豈其然乎諸說惟桑氏爲有據不特此耳宜其以水名家也

時水○通志略曰一名彰襄三年齊晉盟于彰是也其源岐淺多涸竭又名乾時莊九年公與齊侯戰于乾時是也道元曰時水出齊城西南廿五里平地出泉卽如水也水色黑又名黑水今按時水之原南近淄水詳其地形水脈蓋伏淄所發土人名曰烏河西北逕黃山又北逕愚山又屈而逕杜山澧水入焉澧出臨淄西南十八里所謂澧中孟子去齊三宿出畫故又名宿留水俗謂之泥河又北逕臨淄城北系水入

焉系出臨淄城西申門卽申池水也門側小阜曰包

山俗又名包河竝城北流分爲二俱入時一支逕梧

臺前西入者曰系水一支遠至博興東南李監橋入

者曰澗水詳見澗水條時水又北至般陽新城縣東

南索鎮口下可通舟楫又北至博興南地名灣頭樂

水會焉樂卽小清河又東逕利縣故城在樂安西又東逕樂安

縣北又東北由馬車瀆入海水經謂時水自西安城

南石羊堰分爲二支津西北合黃山之德會水黃阜

之南五里泉至梁鄒入濟旱則涸竭此乾時也今不

通矣欽嘗自濟南護先妣喪由小清汎舟東下至博

興沂時水南上至索鎮而登陸去益都僅九十里耳

益都衆水惟此通舟未嘗淺涸焉

澗水○水經註澗水出臨淄縣北世謂之漢溱水逕博興縣南貝丘齊侯田見公子彭生處又西北入時水昔晉侯與齊侯宴曰有酒如澗指喻此水也即今臨淄西門申池水北流者勢極屈曲俗稱九里十八灣過梧臺北小泥河入焉泥河出梧臺下又北至博興李監橋入時水此正澗水也魯仲連謂田單黃金橫帶騁乎淄澗之間此水與淄東西竝流臨淄介其間故齊侯有酒之喻田單馳騁之地淮南子謂淄澗合流易牙嘗而別之者皆指此水也古諺謂瘦馬不渡澗南燕李宣謂澗水不冰良由逼帶京城者乃濁水

耳詳見濁水條

巨洋水○水經云出朱虛縣東泰山國語謂之具水袁

宏謂之巨昧王韶以爲巨蔑或曰胸瀾或曰沫實一

水也今謂之洱河出沂山西麓即東泰山也東北流

至臨朐縣東南熏冶泉入焉熏冶出縣南西溪又北

沙河出東阜下北來入焉又北至臨朐城東逕覆釜

山又北逕委粟山水經云孤阜秀出形如委粟今名粟山又東北石溝

水入焉石溝出逢山東北石澗中山即石膏山麓三成水經名

北洋蓋因巨洋在南也又東北龍岡水出臨朐東北

窰山東來入焉又北過益都府城東北建德水合南

陽水入焉建德水出府南七里澗俗名七里河水東

猶有建德村道元云建德出逢山邳泉出平地今按

德非入巨洋也南陽水見後條又東北康浪水入焉道元云

康浪出劇縣西南嶼山西流入巨洋即今香山南狗

王河三齊略曰康浪水在齊城西南十五里康衢側

微細且歌云中有鯉魚長尺半此水豈足當之寰又

北逕巨昧店耿弇追張步處又東北逕辟閭渾墓俗

名釣魚臺又東北逕故益縣城古別出一支為百尺

溝道元謂西北入巨又北逕壽光縣東北水經云舊

有孔子問經石室即蒼頡墓也堯水入焉堯一名蕤

又名青出府東南七十里角崩山又東北由黑冢泊

入海黑冢泊述征記謂之烏常泛齊人余按漢志石

膏山洋水所出東北至廣饒入巨淀即此水也但因

北洋而誤其源因支津別出而誤云入巨淀曾肇南

洋橋記乃以洋為南陽非也洋為齊之大川故以巨

名道元所謂羣書盛言孟堅不應捨大而志小

南陽水○水經註長沙水出逢山北阜世謂之陽水北

注濁水通名為陽而有南陽北陽之論又云逢山即

成壁立直上余按南陽水出府城西南二十五里石膏山

即逢山之西麓也東北逕廣縣故城西又東北石井

水注之水出劈頭山北流注井積石高深瀑布而下

故曰石井亦謂之石子澗即今之瀑水澗也時有通

塞南陽水又北而東貫益都南北兩城閒西逕表海

亭東逕故城陽王廟基古人自廟東塙斷使北注濁水今復東流十五里合建德水入巨洋

北陽水○漢志曰爲山濁水所出東北至廣饒入巨淀水經謂之北陽亦謂之澠水出府城西南三十里九

回山俗名九扈古廣縣爲山也東北逕五龍口又北逕廣

固廢城行於絕澗之底水激而岸峻古諺謂瘦馬不渡李宣謂逼帶京城皆指此也又北逕堯山東至東

陽城北又東北逕石槽城又東北逕臧臺又北至樂

安東北獯河口合女水女水後條又東北入巨淀○曾肇

南洋橋記曰俗呼洋水有二曰南洋河今橋所在是

也曰北洋河距城北二里者是也北洋傳記無文今

出九回山入淄水此水不入淄在齊記謂之澠水道元則

曰羣書盛言洋水出臨朐陽水導源廣縣兩縣雖鄰

川土不同於事疑焉然則洋分南北當後魏時已不

能知況後世哉今辨之曰羣書盛言出臨朐者此巨

洋也漢志失其源委耳南陽自爲長沙水北陽自爲

濁水導源廣縣者是也曾氏乃因漢志石膏山之洋

水而以陽爲洋誤矣蓋石膏山與逢山連麓長沙水

即南陽水出其西石溝水即北水出其東洋水自出臨朐沂

山漢志讀如詳與蜀之洋州同音故水經稱洋水則

有巨洋北洋稱陽水則有南陽北陽稱南洋者無之

俗所誤矣四水雖以音同致疑源流可攷惜乎曾氏

之不察也

天齊淵○漢志曰齊所以爲齊以天齊也秦祠八神一曰天主祠天齊天齊淵居臨淄南郊山下五泉竝出南郊山卽牛山也按此淵在臨淄東南八里淄水之東女水之西平地出泉廣可半畝土人名曰龍池西南流入淄水牛山在淄水南遙以爲志耳蘇林註曰當天中央齊也顏監曰謂其衆神異如天之腹齊齊記補引晏子曰吾聞江深五里海深十里此淵與天齊淵中浮出瓦有天齊字魏永平中水潰出木五北齊天保中又出木四皆五采類松柏而香構亭水上臨淄俗上已被禊于此有神祠曰休應之廟余按六

書故齊本作𠄎亦作𠄎象禾穀之秀齊也引之爲整齊齊一又爲國名借爲人之腹齊莊子達生篇曰與齊俱入與汨俱出齊者水之旋紋今人謂之旋窠狀類腹齊豈淵泉竝出旋流如齊以其祠天稱曰天齊邪抑天然淵水猶曰齊之天淵云耳且臨淄非天地之中何謂天之腹齊深與天齊尤覺誕妄

女水○水經云出東安平縣蛇頭山又名鼎足山今臨淄東南十五里俗呼二王冢者因山兩墳謂是桓公與其女之冢水出冢側因以名焉然此水通塞不常出則逕石槽城東北入北陽水水經云女水至安平城南伏流十五里然後更注陽水今石槽城

古安平

北平地出泉俗名馬臺河至樂安東北獾河口合北陽水入巨淀土人云此卽二王冢水伏流者未知是
否齊記補引黃石公記云東海龍女隱于此石室尙存將還作此水甚有神焉化隆則水生政薄則津竭
述征記亦有此說恐未必然通鑑作汝水南燕汝水竭卽此水也

汶水○水經出朱虛縣小泰山今沂山絕頂穆如陵側

有瀑布泉懸百丈崖而下卽汶水也東流循鳳凰嶺

折而北逕大峴山陰峴水入焉穆陵關北之水又北逕蔣峪

口有水出峪中西來入焉水經有崕山水以爲汶源疑卽此水又北逕

龜山陰山形如龜臨水乃折而東逕柴阜水經注阜南管寧冢阜北邴原冢

又東北逕安丘南牟山水經注山西孫嵩冢又東北逕安丘城

西又東北入于濰水經注古淳于縣濰汶交會處是也顏監曰前言汶

水出萊蕪入濟今此又言出朱虛入濰將桑欽所說

有異或者有二汶乎余按入濟之汶見禹貢論語之

汶上書傳謂之北汶卽今大清河入濰之汶見漢書

入沂之汶見水經濟有三汶清河爲大述征記泰山郡水皆名汶

有北汶嬴汶柴汶牟汶皆源別流同又在三汶之外

丹水○竹書云堯放丹朱于丹水朱虛縣有丹山一名

凡山黃帝所禪又名堯山下帶長阪曰破車峴東西

二丹水出焉記謂丹朱弄兵之所今按西丹出丹山

在臨朐縣東北三十里東丹出方山在丹山東北寰宇

記丹山崩方 二水皆北流至昌樂廢城西北乃相

合通名爲丹河北入于海寰宇記丹水入昌樂縣界

可引漑者極多古人陂渠遺迹猶有存者自金人入

中原民俗偷惰爲政者何慮及此然則史令所譏豈

特西門 白狼水○水經註出丹山逕北海郡城東入別畫湖亦

曰朕懷湖東北入海余按白狼有二源一出丹山隋志

作白 狼山一出北海縣南小王莊平地泉湧如輪上源合

此始大逕濰州東門外古有石梁金泰和間僧普濟

所修遺迹尙存又東北過寒亭合漑水入湖由湖入

海漑水出塔山寰宇記云山形如 卽今東虞河以州

塔又名漑源山 西有西虞河故此云東西虞出黃山又有朱流河出

方山七里河出蒙姑山三水皆在州西北流入海

巨淀馬車瀆○漢志曰爲山濁水所出東北至廣饒入

鉅定又曰馬車瀆首受鉅定東北至琅槐入海定作

淀水澤名縣因氏焉卽今樂安東北清水泊也北出

爲馬車瀆今高家港也淄水濁水入巨淀時水入馬

車瀆同歸于海南洋橋記乃以鉅定爲巨洱河今巨

洱自壽光東北入黑冢泊巨淀馬車在壽光西北相

去六十餘里不合漢書首受鉅定之文濁水亦無入

巨洱之理曾子開誤矣溝洫志東海引鉅定漑田鉅

膠水南定渚渠卽漢

武所耕處非東海地 膠水○水經云出黔陬膠山今膠州膠西縣西南鐵櫬

山也北逕密州東北鹵山古名五弩山鹵水入焉寰宇

記膠水出密州諸城縣東崦山或亦曰膠水出鹵山皆非是又北逕高密縣東北

入都樂都樂者水經謂之夷安潭秦地圖謂之劇清

池即古獒養澤也張奴水出高密東阜下亦注此澤

自澤北出注新河張奴水一名墨水由河北入于海

其東北入海者膠水之故道差淺而新河為經流新

河者至元初萊人姚演建言首起膠西縣東陳村海

口自東南趨西北鑿陸地數百里欲通漕直固海口

數年而罷余嘗乘傳過之詢土人云此河為海沙所

壅又水潦積淤終不能通徒殘人耳演真鄭國之罪

人也

姑尤水○左傳昭二十年姑尤以西注齊東界姑水尤

水皆在城陽郡東南入海今按沽水有二曰大沽河

出黃縣南蹲狗山俗名狗兒山曰小沽河出萊州南馬鞍

山二水俱南流逕膠水縣東南朱毛城東朱毛即古即墨城

乃相合通名為沽河至膠州東南入海沽水起北海

至南海行三百餘里絕齊東界故曰姑尤以西尤即

小沽河耳

沂水○鄭康成云沂水出沂山水經云出蓋縣艾山寰宇

記艾山一名臨樂山在新泰縣東北三十里道元則曰沂有二源一出祚

泉山一出魚窮山余按今蒙陰縣東北地名南河川

小阜之下有曰狗泉泉傍神祠塑黑狗不知何據疑此則臨樂山也此沂源

也東南逕馬頭固山有泉東流與之合北望沂山五
十里殊無別源據周禮沂山因沂水得名康成又齊
之大儒不應有誤疑沂山水源古流今竭耳沂水過
馬頭固南流逕蓋縣故城又南至沂水縣城西又南
至河陽村桑泉水西來入焉道元云桑泉出五女山
南流納堂阜水卽今蒙陰東北憚阜大小二河也又
南合蒙陰水通名爲汶河東注沂水經桑泉亦稱汶故今云沂水
又南逕諸葛城又南逕王祥墓孝感水入焉其水出
墓西戚溝湖剖冰躍鯉之地又南至沂州城東小沂
水西來入焉小沂出蒙山西東過費縣神山納訪水
訪出縣南關陽川至沂州西又分爲涑水涑自州城

西小沂自城北俱入沂宋慶歷間沂州修城碑云大
小二沂環流外轉而小沂尤湍于西北平日波如簞
紋清淺可愛及山雨水至如百萬陣馬摩壘而來謂
此水也沂水又南分流入三十六穴湖東通流水詳
見流水條又南逕古郟城又南至下邳入泗下邳古
城在今邳州南道元云沂水至下邳分爲二一自城
北趨西南入泗一自城之東南入泗東沂水上有橋
郡國志謂徐泗閒呼爲圮音怡橋也子房遇黃石公進履
處今入泗者西沂耳

流水○水經註大弁山與小泰山連麓流水出焉

大弁今訛

作大

漢志謂之術水元和志云俗名漣水出沂山東

麓逕大峴山峴水入焉穆陵關南入流之水又南至老牛嶺嶺長

二十折而東逕嶼山嶼水入焉嶼水出嶼山水經謂

之箕水又南至洛山洛水西來入焉洛水出壇頭山

又南逕莒州城東又南沙河水西來入焉沙河首受

西湖水湖受黃華諸水皆莒城西北羣山泉瀦為湖

又南溫泉西來入焉泉出沂州東北湯山古名溫水

入沂又東逕倉山道元云山上有鹽官城即漢封劉

非也今屬贛馬嶺羽山極縣東南百十里是也由吾寰宇

平山南有由吾廟隋文帝徵道士由吾拜諫議大夫

卒葬此山水經又云流水逕司吾山東疑即巨平山

也漢有羣山聯絡流東沂西夾山而行山峽之間有

山口池者俗云禹鑿沂水由三十六穴湖貫此峽口

與流相通道元謂辟陽水首受葛陂水入流者又南

至流陽縣入桑堰湖烏侯切道元謂桑堰水出襄賁

獲湖在流陽縣東八十里與胸山湖東出入于海

連水三分湖為界今訛作桑口湖

流水至此正名漣水故縣氏焉道元又謂流水下流

古分為二今名南漣北漣魏正元中齊王鎮徐州立大堰遏

水西流兩瀆之會置城防之名曰曲流戍其流西入

淮陽由下邳入泗余按宋金相拒宋人亦堰此水乃

防北敵遺迹在今海寧流陽界中

泐水音加俗作去聲讀泐水有二東泐出沂州西北其山城內

普照寺有金僧居南流至卞莊站國初立東分一支

入芙蓉湖溉田數千頃湖在沂州東南芙蓉山下香

粳鍾畝古稱琅邪之稻卽此西泐出嶧州東北抱犢
 山東南流至三合村與東泐合又有魚溝水出浮丘山合于此故名三合
 南貫四湖溉田倍芙蓉又南合武河入于泗謂之泐
 口淮泗舟楫通焉元和志云承縣界有陂十三所皆
 貞觀以來修立以溉田者今沂嶧二州仰泐承二水
 溉田青徐水利莫與爲匹皆十三陂之遺迹也武河
 者疑卽漢志冠石山之武水水經亦謂之小沂上流
 有故渠俗名文河土人云浚此渠六十里使武河通
 沛可避呂梁徐洪之險而徑達新濟矣徐邳人恐徒
 河無業每沮之

承水○音澄漢縣名元和志云承縣以西北承水得名寰宇

記云承治水出縣西北方山王莽改承縣爲承治故
 水有此名今又訛爲承治本出嶧州北六十里花盤
 山之車梢峪源曰滄浪淵淵旁有龍祠宋政和間賜
 額霖澤廟其水南流合許池泉今滄浪淵水微細不
 及獨許池爲正源矣承水又南逕州城西門又南納
 金注河又東會武河南入于泗承水溉田千餘頃旁
 多美竹人賴其利

南梁水○後漢志魯郡蕃縣蕃音皮有南梁水道元曰蕃

縣東北平澤泉若輪焉南鄰于鄒亦謂之西鄒水首
 受蕃縣西注山陽湖陸二水皆由沛入泗今按南梁
 水出滕縣荆溝村西南流至滕州東門外折而過城

齊乘 卷之二 三
北又西入山陽湖山陽俗曰刁陽由湖南出注于泗
南有薛水即古濇水出州東高山春秋魯取邾田自
濇水杜註水出東海合鄉縣西南經魯國至高平湖
陸縣入泗蓋此水也又有沙河水出鄒嶧山皆西南
流至山陽湖與南梁相合同入于泗名三河口

般陽水

籠水○水經註作瀧水南出長城中寰宇記云古名孝
水齊有孝婦顏文姜事姑孝養遠道取水不以寒暑
易心感得靈泉生于室內文姜常以緝籠蓋之姑怪
其須水即得值姜不在入室發籠觀之水即噴涌壞
其居宅故俗呼爲籠水今孝婦河也出益都縣顏神

鎮孝婦祠下

古齊長城踰泰山東互于此

西逕萊蕪山陰北注般

陽城西般水入焉般亦名左阜水出淄川縣東南龍
山龍灣洞俗名頭河西北流至般陽城東分爲二一
支逕城南一支環城西北俱入籠故水經云般陽縣
在般水之陽也籠水又北逕長山縣西又北逕鄒平
縣東蒙河水入焉蒙水俗名沙河出長白山葫蘆峪
水經謂之魚子溝又北逕新城縣西又北入小清河

濟南水

樂水○

源曰趵突流曰樂東導曰小清

曾南豐齊二堂記曰泰山北與

齊東南諸谷之水西北匯于黑水之灣又西北匯于
柏崖之灣而至于渴馬之崖則泊然而止今黃自崖山下

齊乘 卷之二 十四
以北至于歷城之西蓋五十里有泉湧出高或致數尺名曰趵突之泉齊人謂嘗有棄糠于黑水灣者見之于此其注而北則謂之灤水春秋桓公十八年會齊侯于灤是也今府城西平地泉源鬻湧雪濤數尺聲如隱雷旁合馬跑金線諸泉周可數畝北出又合蜜脂五龍衆泉竝城北流屈而東至城北水門大明湖水出而注之東北至華不注山合華泉即齊頃公取飲者三齊記云歷山下有無底井與此泉通山之西南引水溉田水經謂之歷水陂餘波西注大清曰聽水即今之響河古灤水自華不注山東北入大清河偽齊劉豫乃導之東行爲小清河自歷城東逕章丘鄒平又東逕般陽之

齊乘 卷之二 十五
長山新城又東逕高苑至博興合時水東北至馬車瀆入海曲行幾五百里故自濟南東傳博興南源衆水古入濟者今竝入小清焉○小清爲運鹽河初行高苑縣北金皇統間縣令高通改由縣南長沙溝然此水迂曲上流岐淺鹽舟多梗議者欲引孝婦水西注上流非計也蓋小清舟不過欲達大清耳若自博興引渠至蒲臺立堰平原僅五十里徑達大清矣
大明湖○水經註灤水北爲大明湖西有大明寺水成淨池池上有亭湖水引瀆東入西郭而側城北注又上承東城歷下泉源競發北流出郭注灤水詳此則大明湖亦源于灤城西五龍潭側古有北渚亭豈池

亭遺跡邪湖今在府城內周十餘里即歷下泉源競發北流出郭者也歷下名泉有曰金線東曰皇華

曰柳絮曰臥牛東曰東高曰漱玉南曰無憂曰

石灣南曰酒泉曰湛露西曰滿井曰北煮糠北

北曰北珍珠樓前曰散水曰溪亭北曰濯纓北

曰灰泉西曰知魚東曰朱砂泉曰劉氏北曰雲樓劉

以下皆匯于此周回廣數曰劉氏北曰雲樓劉

南曰登州曰望水萬竹園內曰洗鉢登州曰淺井曰馬跑

洗鉢西曰舜泉舜祠曰香泉舜泉曰鑑泉舜泉曰杜康

南曰金虎曰黑虎李承務巷曰東蜜脂金虎曰西蜜脂

東蜜脂西曰孝感孝感坊內曰玉環同知巷前曰羅姑場行

混沙曰灰池城西南曰南珍珠鐵佛巷曰芙蓉姜家

滴水又名清泉曰灰灣曰懸清城西曰雙桃城西

街曰溫泉城北曰汝泉神童寺內曰龍門一名龍泉

曰染池龍門曰懸泉中宮曰都泉中宮曰柳泉曰車

泉中宮曰煮糟四里曰爐泉南山曰白虎曰甘露

大佛曰林汲佛峪曰白泉王舍店曰金沙曰白龍龍洞

曰花泉張馬泊曰獨孤靈巖曰醴泉巖北曰漿水盤水

南曰南煮糠蟠山曰苦苣柳鋪曰熨斗黎峪門曰鹿

泉石固曰龍居長城合鈞突百脈總七十二見名泉

碑然遠至中宮靈巖諸泉具載而華不注之華泉明

水鎮之淨明泉皆失不取況其名亦未甚雅稱蓋殘

齊乘 卷之二 三
金俗筆欽嘗擬會波樓記略云濟南山水甲齊魯泉
甲天下蓋他郡有泉一二數此獨以百計濤噴珠躍
金霏碧滄韻琴筑而味肪醴不殫品狀在邑者瀦市
之半在郭者環城之三棊布星流走城北陬匯于水
門東流爲灤竝于汶過于時入于海可槩見矣

百脈水○水經出土鼓縣故城西元和志出亭山縣東

北亭山在府城

源方百步百泉俱發故曰百脈卽繡

江源也郡國志云十二斤溝俗名麻灣出章丘縣南
明水驛明水一名淨明泉出百脈西北石橋邊其泉
至潔纖塵不畱土人以洗目退昏翳與西麻灣水合
流三里餘入繡江乃東北流逕東陵山漸章丘東城

又北入小清河縣東七里有楊緒水一名獺河水經

云出逢陵故城西南逕章丘城北入濟水今按獺河

出長白山之王村峪逕章丘東北入小清河○曾南

豐齊二堂記云泰山之北與齊東南諸谷之水西北

匯于黑水之灣又西北匯于柏崖之灣而至于渴馬

之厓泊然而止至歷城西湧出趵突之泉嘗有棄糠

于黑水灣者見之于此其注而北謂之灤水齊多甘

泉顯名者十數而色味皆同皆灤水之旁出者蔡氏

援此以證濟水之伏破程氏之論當矣又取沈存中

筆談謂歷下發地皆泉濟水經過其下自相矛盾何

邪且古濟行清河如在井底南仰泉源遙在山麓豈

能相及今黃山渴馬厓水伏而可證又龍洞山中朗
公谷諸水東西伏流土人云西發趵突東發百脈驗
之信然蓋歷下衆泉皆岱陰伏流所發西則趵突爲
魁東則百脈爲冠地勢使然何關于濟存中得之傳
聞九峯按圖索駿容有疑誤近官濟南者遂定以灤
爲濟建濟瀆廟于泉上謬矣

巨合水○水經註巨合水南出雞山北逕巨里故城耿
弇討費敢處又北合武原水入濟按巨里在歷城東
七十里自宋爲龍山鎮巨合水出鎮南五十里曰榆
科泉逕巨里西武原水出鎮南十餘里曰江水泉逕
巨里東俗訛爲東西巨冶河俱北流五里餘乃相合

北入小清河巨合之得名以此道元云巨里三面有
城西有深坑坑西卽耿弇營蓋二水環繞因崖以城
爲險固也

大清河○

古濟
今汶

水經註濟枯渠注巨野澤澤北則清水

巨野今梁山泊也北出爲清河古自壽張縣安民亭

亭北對安民
山今日安山

合汶水汶出泰安萊蕪縣原山之陽水

經謂之北汶西南逕徂徠山陰又西逕泰山之陽漢
武明堂遺跡臨水謂之石汶又西逕汶上縣北又西
逕東平城南其西卽安山閘閘下泥河口有亭子店
古安民亭遺趾清濟與汶合處今閘清水南導任城
則清濟不入汶汶自行古清河矣汶水又北逕漁山

東卽瓠子歌之吾山在安山東有漢隄遺跡自西而東屬之麓山西曹子建冢山東漢黃河故渠又北逕陽穀縣西流水合狼水入焉又東北逕東阿縣道元云縣東北有清亭春秋隱四年遇于清以河得名也又東北逕平陰縣廣里保古齊長城防門河道所由春秋齊侯塹防是也廣里見水經又名光里又北逕巫山齊侯登以望晉師者俗訛作無兒山山上有石室水經謂之孝子堂今日郭巨廟清水過此古爲湄湖又東北逕齊河縣縣南門外有梁跨水古朝陽橋遺跡耿弇渡處齊河縣在宋爲耿濟鎮沙溝水出山桂縣南來入焉今肥城縣東南有沙溝鎮以水得名又北逕上灤橋北灤水分響

河入焉古名聽水又東北逕華不注山陰又東逕下灤堰

灤水舊入濟處堰南卽小清河又北逕臨邑縣又東

北逕濟陽縣又北逕齊東縣河間路屬縣古東鄒又東北逕蒲臺

縣又東北逕高苑縣北又北逕利津縣城東又東北

入于海水經云濟至古平安爲淵渚謂之平州沉又東北至琅槐鄉有古黃河通濟枯渠謂之灤

河又東北入海元和志謂海浦浦旁有一沙阜高丈餘俗呼鬪口淀濟水入海與海潮相鬪故名淀上有井極甘海朱子韓文考異曰按水經河水至東阿荏

潮不能沒

平等縣東北流四瀆津灌注之河水東分濟水受河

蓋滎口水斷不通始自是出與清水合昔趙殺鳴犢

孔子臨河而歎作歌曰狄之水兮風揚波舟楫顛倒

更相加歸來歸來胡爲期按臨濟故狄也是濟所經

得其通稱詳此則是濟水自滎澤之下潛流至此四瀆津口而復出河又東分一支與之合流以過臨濟而爲狄水然此皆齊地在今濟鄆之間史記以爲孔子自衛將西見趙簡子則其道不當出此此又不可曉者今姑闕之以俟深于地理者考焉欽按漢陳畱郡平丘縣有臨濟亭故狄也蓋濟水出陶丘北南瀆被孟豬北瀆注巨野亭臨此瀆故曰臨濟春秋時狄人據此因以名焉此水夫子所歌至王莽時枯竭水經所謂濟枯渠注巨野者也其自巨野北出至四瀆津與河合流者乃齊之清河水經所謂得其通稱者是也漢千乘別有狄縣安帝更名臨濟唐又別以漢

東朝陽爲臨濟今章丘之臨濟鎮也文公蓋疑于此云

古河○朱文公九歌註曰禹治河至兗州分爲九道以殺其溢其閒相去二百餘里徒駭最北鬲津最南徒駭是河之本道東出分爲八枝也胡氏大記曰大陸澤北九河之地平延漫流易淤故禹多與之地使下流通曠齊桓擅一時之利適河行徒駭因以八河之地充樹藝立城邑下流始迫溢爲患欽按河過大陸趨海勢大土平遷徙不常自播爲九禹因而疏之非河獨行經流禹于旁近支鑿以殺其溢也禹後歷三代至齊桓時千五百餘年矣支流漸絕經流獨行亦

理勢如此非齊桓冒曲防之禁故塞九河實九河自
 為平陸可樹藝耳至定王五年河遂南徙砢礫漢世
 漸決而南元帝永光中決于清河分流入博州後又
 決于平原乃東入青齊二州之境遂由漯川與濟竝
 行入海宋紹熙以後乃南連大野并泗入淮金初又
 改由渦近歲復由泗入淮河濁淮泗俱清清淮勢大
 可以吞伏故下流無淤塞之患惟汴宋之郊盤屈平
 壤潰決如故自定王以來又千五百餘年河自北而
 南徙千餘里今按桑田之地講求變遷之陵谷欲盡
 合古書漢矣難世去古未遠河隄都尉許商言九河
 故道謂徒駭在成平金獻州樂壽縣景城鎮古有成平城胡蘇在東光

今景州東光縣東連滄州古有胡蘇亭

一鬲津在鬲縣德州有鬲縣城曰太史曰

馬頰曰覆釜在東光之北成平之南曰簡曰潔曰鉤

盤在東光之南鬲縣之北斯言簡而近實後世圖志

雖詳反見淆亂欽嘗往來燕齊西道河間東履清滄

熟訪九河故道蓋昔北流衡漳注之今之御河漢初猶入河漢魏時

以名漳水隋唐以來名御河河既東徙漳自入海安知北流之漳非

古徒駭河歟宋會要神宗熙寧三年議開御河臣寮奏云可于恩州武城縣開約二十餘里

則入黃河北流故道下五股河詳此踰漳而南清滄二

州之間有古河隄岸數重地皆沮洳沙鹵太史等河

當在其地滄州之南有大連澱今日曰大梁五龍堂宋碑作大連疑即隋末

羣盜所據之西踰東光東至海此非胡蘇河歟豆于毓也

至西無棣縣百餘里間有曰大河曰沙河皆瀕古隄

縣北地名八會口土人云因河會得名縣城南枕無棣溝茲非

簡潔等河歟無棣溝通海隋末廢塞唐薛元鼎開之

魚鹽至昔日徒行今騁駟美哉薛公德滂被凡此溝

澗今皆為鹽司堰塞平時潏水不通纜遇霖雨水即

潰溢故河閒清滄之地常被水害無有寧歲吾友伯

答爾都水嘗言撥丁河數場雖課與山東運司帶辦

廢堰泄水則河開永無患矣東無棣縣北有陷河闊

數里西通德棣東至海茲非所謂鉤盤河歟德州有

濱州北有士傷河西踰德棣東至海茲非鬲津河歟

士傷河最南比他河差狹是為鬲津無疑也所謂土

人云昔日戰場因傷賢人故云按水經漢安帝時劇

縣賊畢豪等乘船寇平原縣合劉雄門下小吏所輔

浮舟追至厭次津戰敗為賊所擒輔求蔡氏書傳乃

代雄豪縱雄殺輔于此津蓋此河也

曰自漢以來講求九河皆無依據祖王橫之言引碣

石為證謂九河已淪于海欽按禹貢文北過泲水至

于大陸又北播為九河同為逆河入于海大陸在邢

趙深三州之地爾雅之廣河澤也去海岸已數百里

大陸又曰鉅鹿呂氏春秋曰鉅鹿之北遂分為九河

路史云九河始元城大名縣西三里有故瀆鄭夾滌

謂大陸非趙地之廣河澤乃汲又東至海中始敘九

河則大陸與九河相離千里如是之遠而絕無表志

不合禹貢之文其不可信一也王橫謂海溢出浸數

爲九厥後或三或五遷變多寡不同必欲按名而索故致後儒紛紛之論不得不辨

海○海岱惟青州謂東北跨海西南距岱跨小海也本名渤海亦謂之渤解海別枝名也蓋太行恆嶽北徼之山循塞東入朝鮮

今高麗

海限塞山有此一曲北自

平州碣石南至登州沙門島是謂渤海之口闊五百里西入直沽幾千里焉漢王橫乃謂九河之地淪爲小海然則唐虞之時青州跨海者跨何海邪且海溢出浸數百里河自秦漢以來青兗營平郡縣不聞有漂沒之者足證橫失海溢者有之橫言之過也近世蔡氏書傳金履祥通鑑前編皆祖橫說又謂小海所

淪青兗北境悉非全壤豈二州北境有荒漠棄地爲海所漸而歷代信史不之書邪無是理也蓋因委九河於海中指碣石在海外遂有此論今青境無缺茲不必辨古兗之地自今濟南以西北包濱棣滄瀛帶雄鄭西襟深冀南遶曹濮東括魯鄆四至亦不狹矣在春秋戰國其地瓜分後世從而小之未詳考也金氏又云碣石有二在高麗者曰左碣石在平州者正禹貢之右碣石也乃今沙門島對岸之鐵山正當渤海之口果爲右碣石則唐虞之時青兗東北直岸大海無渤海矣此又可信邪今齊境東南則日照卽墨膠州正東則寧海登州皆岸大海東北則萊濰昌邑

正北則博興壽光西北則濱棣二州皆岸渤海云

齊乘卷二

錢唐周嘉猷兩塋校



